

## U FATTE D'U MONECHE CA CACATTE U LIÉTTE

A tiémpe antiche, ze ne iva sèmpe la currènte élèttreca, spècie de viérne ca sciuccàva e facèa štravèrie pe tutta la vernata. M'arrecorde ca, allora, a Campuasce facèa normalmènte nu mètre e mmiéze 'è néva.

La cucina, me recorde ciérte sére štèa allumenata sulamènte da la sciamma d'u camìne e nu', tutte le criature, lànnante a sentì a tatille che ciarràccuntàve le fattariélle antiche.

Forze évene le štésse che ce l'avèa raccuntate tatone, quann'isse éva peccerille.

Sa' cummà, tatille éva d'u 1860 e avèa canusciute a Garibalde e a chille tiémpe dicèa ca éva répubblicane e le piacèa la parola 'è Giuseppe Mazzine.

Mè, lassame 'a j' la štoria e la politica, ca qua 'nc'éntra proprie.

Mó a la séra, štèa dicènne, ca pe ce fa šta zitte e férme, ce raccuntave le fattariélle e une 'é chisse fatte éva " U moneche che cacatte u liétte".

Štèa na vóta nu moneche de cérca che iva facènne la quèštua pe le campagne e addò ze 'ppresentava le rialàvene òglie, vine, farina, patàne, nuce, mènnule e ógni grazie 'é Ddiè.

Allóra 'nce štèane le vije e ze cammenàva pe le tratture e štrare mulattiére e spisse ze 'ncuntràvene pure le brijante che t'assalivene e te repulivene 'e tutte chélle che pussedive e avija rengrazià u Signore, se te lassàvene le mutande 'nguólle e la pèlle.

Mò, 'štu povere moneche, z'alluntanatte nu poche 'é cchiù a fa 'šta quèštua e pe la vija d'u ritorne le cugliétte notte. E allóra va 'ncérca 'é nu reciétte pe passà la nuttata a u sicure.

Cammenanne pe campagne e mulattiére vére 'a luntane na lucétta e pènze " chélla sarà na massarija, mò vaglie e chiéde d'èsse uspetate".

Ze 'ncammina e arriva a 'šta casétta. Vusse a la porta e da réntre sènte na vocia cupa ca responne " chi è che z'appresènta a chéšt'ora a la casa mè?".

U moneche responne " Aprite so' fra' Fuse e chiére aiute ca me so' sperdute...".

Allóra la porta z'aprètte e scétte fóre na fémmena che na faccia d'àngèle e nu 'mmaccature 'ncape che dicétte: ma che vuléte, nu qua 'ntenéme pošte.

Allóra u moneche la préja, le dice " i' m'accuntènte de nu puštariélle pure rént'a la štalla". E vabbuone dicétte la fémmena. U manne a durmì a la štalla e mména l'uocchie a la grazia 'e Ddiè che tè u moneche pe réntre a le vesàzze.

Va da u marite e le dice: Uéh, u moneche tè' nu sacche 'é rròbba che nu' nne l'éme maie višta, sa che vuléme fa, i' mo u vaglie a chiamà e le diche ca ce šta nu pošte a u liétte, però bašta ca nne cache u liétte, sénno so mazzate.

Po', facéme na pulènta e quanne quille piglia suonno, ce la mettéme sottè u cule ca quille pe la paura de le mazzate ce lascia tutta la robba qua e ze ne scappe.

U marite ricétte "va buone, è na bbóna penzata".

La fémmena accusì facétte. Jétte a chiamà u moneche e u facétte j' addurmì réntre u liétte e arrepetétte: però "bašta ca nne me cache u liétte, sénno mariteme te mazzèja. E quille te' le mane pesante! ".

U moneche respunnétte: " ma te pare? A chéšta étà une cache ancóre u liétte? Štéte tranquille; nne ve préòccupate".

A na cèrta ora, doppe che u moneche pigliatte suonno, z'auzànnè marite e mogliéra e jènne a fa u zrūizie: Smantànnè chiane chiane u moneche e le ficchiànnè nu poche 'é pulènta sott'u cule e ze ne jènne a liétte.

U moneche sentènne u calóre de la pulènta, chiane chiane, ze svigliatte e dicétte tra sé: Marònna mè' che so' fatte! So' cacate u liétte... Marònna cumme haja fa!

Chište m'accirrene! Penzatte e resolvètte: Mò sa che facce? Me ne èsche zitte zitte e me ne scappe”.

Accusì u moneche ze ne èsce ‘mpunte ‘é piére e ze ne scappe lassànnne tutta la ròbba a chélla gènte.

Quanne turnatte a u cummènte, u patre ‘uardiane addummannatte: “ Fra’ Fuse e u ciucce e la ròbba a ‘ndove la sciè lassate?”.

Fra’ Fuse allora ‘rraccuntatte u fatte a u ‘uardijane.

U ‘uardijane ze ‘ncazzatte e le ricètte nu sacche ‘é parole e u met-tètte ‘n castighe.

E accusì le ddu’ bandite repulènne u moneche de la quèštua.

A la fine po’ tatille ce facèa pure u panégireche ‘ngòppe, ricènne “štéteve attiénte sèmpe a le facce r’angiulille, ca là z’annascunnene le chiù riavulille!”.